

KRADE U MUZEJIMA

Novi broj ICOM NEWS-a donosi informaciju INTERPOL-a sa 12 reprodukcija najvrijednijih djela koja su posljednje vrijeme (u toku 1972-73) ukrađena u muzejima i crkvama Parizu, Tokiju, Washingtonu, Ateni, Rimu (6 kom). Također i snimke 16 drvenih skulptura ukrađenih 12.III 73. iz Instituta za studij Afrike Univerziteta d Ibadan (Nigeria).

PENZIONERIMA BESPLATAN ULAZ U MUZEJE

Austrijsko ministarstvo za nauku i kulturu donijelo je rješenje da svi penzioneri, austrijski državljani, imaju neograničen besplatan ulaz u sve državne muzeje i muzejske izložbe u Austriji.

Ova odluka donešena je još u proljeće prošle godine. Rezultati ovih privilegija penzionerima donijeli su neočekivane rezultate. Muzeji su ne samo stalno posjećivani od strane penzionera, kojima su muzeji postali najomiljeniji cilj izlaska, nego su i od strane penzionera stalno pod nadzorom. Time su muzeji dobili jedan stalan broj publike koja je, bez ikakvog dogovora i primljenog zadatka, primila na sebe službu neslužbenih ali ljubomornih čuvara muzejskih zbirki.

Ova iskustva u državnim muzejima, pokazala su pokrajinske vlade Austrije i uprave muzeja koji nisu pod kompetencijom državnog ministarstva, da slijede ovu odluku i da ju prošire i na svoje muzeje.

Bilo bi vrijedno koristiti se sa ovim iskustvom!

B.

KONGRES KONZERVATORA JUGOSLAVIJE

Počotkom decembra prošle godine u Sarajevu u organizaciji Društva za zaštitu kulturno istorijske baštine BiH održano je savjetovanje i Kongres konzervatora Jugoslavije sa temom "Ustavni i zakonski osnovi zaštite spomenika kulture i zaštite prirode u SFRJ".

Sazivanje savjetovanja i kongresa vezano je upravo za ovako aktuelnu temu, jer najnovije promjene Ustava i donošenje republičkih zakona o zaštiti spomenika kulture i prirode otvaraju nove mogućnosti za dalji razvoj i nove forme u ovoj djelatnosti. Želja učesnika kongresa je i bila da sa svoje strane

doprinesu općim naporima za razvoj demokratskih i samoupravnih odnosa u našem društvu, pa je u ovom trenutku i pao izbor na ovakvu temu, jer je trebalo kroz zajednički dogovor da se pomogne društvenim tendencama u vezi sa pravnim regulisanjem materije koja se odnosi na unapređenje zaštite, a za koju su konzervatori životno zainteresovani.

U radnom djelu Kongresa održani su sljedeći referati - Vladimir Brguljan: Ustav i zaštita spomenika kulture; Jovan Sekulić: Polazne osnove za usklađivanje republičkih i pokrajinskih zakona o zaštiti spomenika kulture; dr Dušan Čolić i Branibor Fabijanić: Ustav i zaštita prirode i dr Feodor Kiselički: Polazne osnove za usklađivanje republičkih i pokrajinskih zakona o zaštiti prirode.

Iz referata, koreferata i većeg broja onih konzervatora koji su se pojavili za govornicom izraženo je zadovoljstvo što je materija o zaštiti spomenika kulture, prirode i životne sredine našla svoje mjesto u Nacrtu ustava SFRJ kao i u nacrtima republičkih i pokrajinskih ustava. I upravo ustavne odredbe, bez obzira što još nisu usvojene, daju izvanredne okvire da se u novim zakonima o spomenicima kulture i prirode ova materija reguliše na širim i potpunijim osnovama nego što je to ranije bio slučaj. Posebno je naglašena potreba društvenog dogovaranja oko sistema organizacije službi zaštite te koordinacije i suradnje stručnjaka za zaštitu i institucija međusobno, kao i institucija sa kojima se ove službe prepliću.

Na kraju Kongresa usvojene su teze u kojim je pored ostalog predložena tješnja međurepublička saradnja, sinhronizacija akcija i razmjena iskustava.

Po završetku savjetovanja održana je IX redovna skupština Društva konzervatora Jugoslavije. Osnovana je nova institucija - Savez konzervatorskih društava Jugoslavije.

Učesnike kongresa i savjetovanja po njegovom završetku primio predsjednik Skupštine SR BiH drug Hamdija Pozderac.

M. Kreševljaković

PROBLEMI ZAŠTITE ČOVJEKOVE SREDINE

Odbor za naučna istraživanja, razvoj i modernizaciju u Rijeci, odnosno Pododbor za zaštitu čovjekove okoline štampao je svoju internu publikaciju pod gornjim naslovom. Publicirano je 12 priloga od 16 autora. Teme su vezane za specifičnu problematiku zaštite prirode i okolice u kojoj živi čovjek u gradu Rijeci. U aktivnosti Pododbora intenzivno su uklopljeni Prirodoslovni muzej sa nekoliko priloga u publikaciji od dr Crnkovića i Regionalni zavod za zaštitu spomenika kulture sa prilogom Beate Gottardi.